

摘藻堂四庫全書薈要

集部

欽定四庫全書薈要

集部

空同集卷二十八

九

詳校官候補通政司經歷臣郭祚熾



欽定四庫全書薈要卷一萬六千九百十九

集部

空同集卷二十八

明 李夢陽 撰

五言律六

乙丑逢先大夫誕辰是歲適蒙恩詔加贈製字

四十用寫哀痛

冬季二十日

老大思童日詩庭儼昔趨  
羈孤萬里外優渥死生俱  
寂寞臨花誥幽冥列大夫  
西雲白蒼莽灑血望松梧



兄以西堂落成蓋悵然有念於二親余心交痛  
頌義追德爰成茲詠焉

矯矯江都相淒涼楚穆生家貧無立業道大不求名破  
甑常蛛網空除任鳥行肯堂兄不忝應慰九原情

讀直道陳公祚遺事

上主能容直當言敢顧身累朝傳諫劄萬死作歸人古  
廟穠花晚孤墳勁草春從來汨沒士特筆在詞臣

哭郡守郝公

征斂無休日斯人不永年曾聞溪虎避早見壁魚懸頌  
碣留邊郡銘旌拂塞天九河一孤塚愁絕海門煙

哭張子

張子者平谷張子禴也以都御史鎮遼東顯矣然  
無何卒李子者張子舊僚也聞之哀焉於是作哭  
張子二章語曰歲在龍蛇賢人嗟張之卒庚辰歲  
也

虎豹威邊日龍蛇哭爾年故人今若此吾道合潛然部

曲歸旌擁風雲舊國連  
薊門秋草徧何處是新阡

其二

翰海龍真泣遼陽鶴竟歸  
壯心元鐵石神爽尚旌旗  
光繞新埋劍香殘舊賜衣  
至今生仲達猶怯孔明威

謁平臺先生墓

豈說嬉遊路今成昔雍門  
平生馬公帳四海孔融尊  
劍烏收殘草山河抱古原  
黃昏不忍去白日下蒿園

溫將軍挽詩

不見千夫勇誰開百戰圍門猶森畫戟苔已蝕金衣俎  
豆諸郎奮山河奕世輝黃昏兩白鶴偏繞北邙飛

聞鄭生死豐沛舟中

短劍英雄氣孤舟疾病身那知生別後竟作死歸人汴  
柳詩筒斷江花總慢新白頭交誼者灑淚向殘春

其二

客櫬收豐沛歸舟渺越吳扶持有令弟書劍付遺孤墓  
草親朋隔山松舊業蕪當年走馬地魂繞孝王都

風

鈴閣晚猶急月窓宵漸輝  
稍驅雲霧散翻重雪霜威  
起坐爐須擁晨看木盡稀  
徘徊問氣勢恐逼漢宮闈

春夜雪

獨客初春夜孤城急雪時  
戰風纔白地欺月已平池  
數聽鴻飛亂虛愁花發遲  
世無戴安道誰見剡舟移

餘雪

饑鳶側目過餘雪且紛紛  
風起惟催霧天空故縱雲回



聲捎竹細疊片壓枝分憂國非吾事占年亦自欣

春雪時帝在宣府

鴉鳴曉雨至零亂忽成花著地融難白隨風弱易斜  
色應疑燕雀寒恐滯龍蛇塞路今休擁春風返翠華

立春日雪

獨有梁園雪風花賦裏寒婆娑遇春日醉起倚樓看鳥  
動紛離樹人來故上闌相逢亟農事誰暇問袁安

鸚鵡

鸚鵡吾鄉物何時來此方綠衣經雪短紅觜歷年長學  
語疑矜媚垂頭知自傷他年吾倘返歸爾隴山陽

詠部鶴

寄跡含香舍淹情嘉樹林長鳴如有訴狎俗到如今不  
染風塵色常存霄漢心會應王子晉接爾向嵩岑

詠鶯

娟娟花絮亂交交黃鳥歸慙慙度碧葉迴轉惜金衣不  
向艷陽語似傷儔侶稀王孫多彈射莫羨上林飛

詠白兔

趯趯來何處爰爰上玉堂不因丹竈躍那覩雪毛香晝  
日行疑月炎天卧有霜異時歸搗藥莫礙廣寒光

鴈

旅館經花夕哀鴻時一聞孤鳴元趣侶亂語欲驚羣漸  
起隨邊角遙傳隔塞雲更深何處落斜月轉紛紛

衝鴈

可怪鄴湖鴈昏飛猶自羣乍翻還近舸忽起盡隨雲浦

濶看疑小山長去不分祇疑南下盡猶阻北書間

白鴈

八月白鴈至中宵聞爾哀亦知先伴起無為報霜來月  
靜飛難見雲深去不回故園消息斷愁病轉相催

裏中見鴈

秋風羣鴈過萬里順歸毛搖落已如此雲霄空自高盈  
盈拂楚塞冉冉影湖濤定出邊烽裏哀鳴嗟爾勞

菊

日麗秋霜白天清野菊黃亦知甘隱逸偏得近壺觴屢  
折元因醉斜簪一任狂乾坤傳舍耳節賞莫思鄉

菊時一種數本其一逾秋獨妍爰及至日黃華韡  
然當庭見者駭歎攜酒來賞余賦二詩紀之

節過諸芳盡冬深爾獨妍那知冰雪候復敞菊花筵藥  
凍黃逾嫩枝疎綠更鮮試令彭澤見應費掇英篇

其二

正色干嚴候殊姿破暮寒名均梅自妬節晚竹同看歲

月陽回易冰霜爾立難無言載酒客繾綣近闌干

菊遲

五家數叢菊節近未含姿種日人同早開時爾較遲編  
籬護密葉繞砌嗅寒枝切恐重陽至無錢足酒卮

丈菊和王左史

丈菊今朝得低垂九尺闌發遲冬已破移早露猶團食  
藥寒難及憐芳仰屢觀縱令他處有爭伴醴筵歡

葡萄

舊榦疎曾訝新條密更垂  
苑花深悄悄風葉漫披披  
馬乳秋同摘龍鬚世豈知  
相傳自西域種雜至今疑

間蟬

夏林疎過雨秋意爾能知  
響入雲俱迴聲迴風故吹  
抱貞惟隱葉避害屢跳枝  
多少垂楊裏爭吟日暮時

詠蟬

孤清不自掩浥露且風吟  
漸送炎蒸月那知獨苦心  
傍齋棲樹穩響葉度雲深  
已信一枝足何須上國林

詠庭中菊

亦隨羣草出能後百花榮氣為凌秋健香緣飲露清細  
開疑避世獨立每含情可道蓬蒿地東籬萬代名

小燕

小燕羣騰壘朝游夕每歸踏枝搖復穩疑路止還飛日  
月銷黃口風雲長黑衣吾家廬室隘好向玉樓依

小雀

黃口青條上翩翩索哺頻解飛猶趁母真性不疑人列



鼎有渚待空城彈射巡野田禾黍遍何處不宜身

小鵲

簷際翻翻鳥將雛喑喑行攬眠真懊惱傳喜不分明化  
印何年就填河幾日平徒然盛生息羣噪每能晴

五言排律

華嶽二十韻

有嶽雄西土三峰插渭川省方朝白帝分野障金天  
逝矣威靈赫遐哉秩望虔百王開寶籙七聖演瑤編  
綺殿

丹青列文窓俎豆聯風雲蒸大壑日月避層顛驚舉天  
門闢鰲呿地軸旋巖巒莽翕沓嶺嶂鬱縣翩猿挂仙人  
掌蘿飛玉女泉霞零夕的皦錦繡曉相鮮葛藟搔金壁  
芝苓冒紫煙石膏滲復結鐘乳滴猶懸右壓秦胡壯南  
包漢鄧偏徒追散馬日緬憶祖龍年箭括通神戶雲臺  
秘妙筌豈惟棲鳳侶亦以遜鴻賢方士騎茅狗宮人採  
石蓮褰帷瞻窈窕拄笏悵攀緣陰井邀雷馭陽崖起電  
鞭聊遊凌絕頂不為學神仙

新秋值雨十韻

積雨塵營寡端居羈思繁火流驚暗換鶴濕想孤鶩鬱  
暑終收虐新涼已破煩覓詩謝眺閣高枕右丞軒簷溜  
衝花落籬湍卷葉奔隨龍動玉闕辨馬失金門屑案螢  
那聚歐齊蛩已喧造朝疎雨具邀友阻吟尊塞國抑應  
盡上林花幾存忽思禾在野躑躅望朝暾

五月大雨省中八韻

五月行秋令新寒奪盛溫萋萋雲色暝颼颼雨聲奔啓

戶涼風進臨溝驟浪喧連山浮海氣大陸走河源已阻  
金門謁疑將華屋翻夜更燈燭坐晝輟簿書煩豁霽思  
長劒歸棲憶故園解誦愁霖作泥中非遁言

紀變

元年建申月彗出掃寒芒勢掩旁星布光於中夜長連  
斥竟大老密奏合文昌台以司空坼星知上將亡流通  
人事邇仁愛帝心藏忽憶臨崩詔看天淚數行

其二

太白今宵見光芒何太明經天復晝見國難且胡兵度  
影休銜闕低空幸隱城天高聽亦下人勝運須更避殿  
惟皇切推輪遣將誠羯奴行就縛飛慰諒閭情

冬日靈濟宮十六韻

貝闕崑崙外浮生此路疑蓬萊移禁國塵世出瑤池最  
爾雙仙跡飛騰後晉時論功竟恍惚識兆且逶迤慙  
精靈託呼噓霹靂隨先皇親議號繼聖必脩辭爵陟王  
侯上尊同帝者師龍襦分內錦宮女準昭儀雨露宮城

切星辰天仗移琳琅搖繡拱松柏蔭丹墀瓶內金花踊  
龕前紫鳳垂晴還日月秘暝則鬼神悲玉鼎推龍虎瑤  
編述姁兒漢惟縈大顯秦竟羨門欺五帝非無術千齡  
今見誰累朝盟誓冊玉櫃少人知

簡何舍人二十韻

黃扉通內閣左順切文華密勿君臣契尊崇禮數加詞  
頭存故事國體與宣麻奏絕銅函密封非墨敕斜四門  
欽舜闢隻日鄙唐邪乾斷人心協風淳主德遐萬方咸

就日六合迴為家司馬元牛走卧龍曾兔置吹噓振羽  
翮變化奮泥沙邦計思劉晏兵謀愧左車分番春扣閤  
捧牘晚歸衙影拂垂城草香攜出苑花讐經違白虎投  
筆困青蛇每憶仙池鳳私慙省樹鴉拘羈那有適追琢  
冀無瑕不忍醒為醉胡由玉倚葭聖朝巢父耳荒里卻  
平瓜稔抱丘園欲私祈紀運嘉鳴文極燕許熙載老姬  
牙帝澤川歸海浮雲莫蔽遮

少傅西涯相公六十壽詩三十八韻

龍馬千年會崧高萬古神負圖曾翊聖間氣又生申  
穎拔元無敵清脩況絕倫生來近日月齟齬上星辰  
懷摘休前輩探環祗後身早承金馬詔竟冠玉堂賓  
講幄時霑醉宮坊數賜珍文章班馬則道術孟顏醇  
絕藝邕斯上高情頡頏隣一揮驚霹靂隻字破風塵  
絢練王侯宅蒼茫海嶽濱幽劄光沕窟巨榜照嶙峋  
星燦將軍碣雲垂學士珉崖題半吳楚墨刻徧齊秦  
振鷺天衢麗登龍野服臻諸生彌濟濟夫子益循循  
江漢誰堪濯桃梅自



有春空傳馬融帳真慕介休中憶昔逢先廟援公輔大  
鈞至人虛密勿君子以經綸商弼調和切虞廷吁咈頻  
八方生氣象萬物荷陶甄日晏離黃閣雞鳴侍紫宸羹  
分紫駝背袍錫錦麒麟顧命留元鼎今皇禮舊臣屹然  
匡社稷公論在朝紳鶉首星躔徙龍飛歲序新風雲回  
甲子天地慶茲辰却老形如鶴憂時鬢若銀含悽麾賀  
客雅志為蒸民愚也蓬蒿士蕭條塞鄙人猥蒙嘘弱羽  
從此躍塗鱗原憲終多病彭宣晚見親臨洋徒歎悅學

步轉遶迤實繪開蓬島清歌頌大椿微涓寧溢海撮土  
詎增岷古意同如此中懷托具陳願為金石擢永永濟  
迷津

在獄間余師楊公誣逮獲釋踴躍成詠十韻

六苑中丞府三邊大將旗先皇親授鉞報主獨褰帷朔  
漠威名壯風霜鬢髮衰功高元避賞道大不容時丞史  
輕周勃朝廷重子儀未論遭鵬鳥先已縱塗龜北固潛  
夫早東山起謝遲蛟龍沒海濶日月倒江垂杖屨金山

寺文章鐵甕碑終頌陸贄詔四海漸瘡痍

赦出館李真人別業顧侍講清暨汪編脩俊俊  
弟編脩偉許枉訪不至十韻

開業傍仙宮逶迤金闕通綵雲偏近日瑤草靜含風野  
性耽沈寂攜遊想數公秋林葉自落露井果猶紅搖筆  
憐清景吹簫望碧空寒山萬井外滄海五陵東却笑籠  
鵝侶翻成失馬翁生涯真畫餅故舊各飛蓬對食懷金  
馬開筵列玉童不知東閣士清論幾時同

赦歸冬日宴劉氏園莊十四韻

脫難旋疆里行歌入宋中陰陽雙轉轂天地一飛蓬  
憶昨遭拘繫悲傷途路窮鄒生猶雨雹列子竟乘風  
歸作墟中叟來從河上公壺觴聊假日村塢坐書空  
卜築劉園麗芳菲漢苑通冬亭饒霧露陽井下霜虹  
候煖冰桃熟林空晚柿紅玉芝穿曲檻青篠蔽虛櫳  
樂極悲心發時違感慨雄古人隨蔓草吾道付冥鴻  
去魯情難忍遊梁跡豈同重思竊符子攬淚宋門東

冬至劉氏園庄十韻

暖暖寒城曙縣縣野徑紆初陽升古戍白露靜園無款  
客琴尊並開堂松樹孤登高望雲物極目散江湖孟澤  
虵龍伏芒碭鴈鶩呼行藏虞氏傳勲業阮生途且盡留  
連飲休嗟序運徂羣蟲迎節動百卉待春蘇日月悲羈  
旅乾坤識故吾寄言招隱者斯地有潛夫

冬野觀射三十四韻

繁臺一名  
講武臺

雲驥橋邊路繁臺寺畔亭登臨壯古昔時序歎沈冥乍

見芳草歇那堪霜霰零久殘拍自秀春逼柳先青叨有  
衣冠會能教酒盞停狂將賓作主興與醉為醒講武仍  
存記威弧合準經鵠違遵取解貂獲放懸庭矢勁風推  
疾弦開月避形奔狸失故窟矯鶴墜生翎疊發無單中  
虛歸必染腥叔才羞縱送蒲弋愧娉婷末德矜先捷高  
賢哂一丁雖非尚力藝亦異養心靈改服遊荒寺攜壺  
扣寂局雪光搖凍薄冷鳥下昏汀宿鵲爭宮坎鳴鐘出  
石櫺哀因樂乃發慮以道為寧憶昔遊梁始伊余實孺

齡探環遊汴館懷橘向王庭十五飛觚翰冠年志典刑  
彎弓獵草澤走馬向林垆頗類沙頭鴈還慚水上萍謬  
隨朝日月過舉犯雷霆擯斥傷垂鵠棲遲學聚螢無論  
顏灼灼已睹髮星星岩眺殘雙屨川游寄一舸烟霜日  
慘慘河漢夜泠泠感舊聊今詠勞歌啓後聽世情真箭  
括吾意竟雲旂嗜武非良節摛文豈至馨緬思羨門子  
永慕令威丁海帝金銀闕江妃碧玉瓶終當別茲土長  
嘯入滄溟

六月豫章城角樓宴集二十六韻

逃暑宜高會登城復此樓開窓萬里盡近檻一江流城  
勢銜天濶山形抱郭幽登臨出百越指顧見東甌暇日  
羣公集飛軒六月秋管絃邀落景觴斚散清眸寧雲  
偏擾迷波地欲浮時花紛浦淑昏鳥識林丘忽在三辰  
上真超萬象遊寰區憐溷濁車馬鬱喧啾解帶烹魚飫  
揮毫藻麗酬微風閒白羽岸幘送沙鷗自昔觀中宇洪  
都實上游匡廬魏律律彭蠡浩悠悠節鉞唐開府春秋



楚大州文章滕閣最風節  
穉亭優下捐塵埃滿鳴鑾樂  
事收濤聲還粉堞草色自芳洲  
已有興亡感魚懷盜賊  
憂羽書諸道急節制大臣留  
立見鯨鯢戮私防玉石仇  
干戈沈戰艦風浪羨歸舟  
河嶽縈三晉秦關啓二周  
凭闌慙後食彈劔想前脩  
解組陶公性思鄉王粲愁  
獨嗤非燕頷猶自說封侯

鄱陽湖十六韻

太祖平陳日樓船下此湖  
波濤留壯色天地見雄圖  
水

上開黃屋雲中下赤鳥士猶詢後載戈已倒前徒力屈  
鯨鯢仆聲回鴈鷺呼橫江收玉筭跨海定金符文軌遙  
通楚梯航訖至吳虎賁雖莫敵龍戰豈全辜血染猶丹  
草骨沈空白蕪汀洲夜寂寂霜月鬼鳴鳴殺氣鼃鼃徒  
腥風島嶼孤甬人拾古鏃艇客慨秋菰偉彼高光烈還  
將蕭鄧須英謀協睿算勇奮想長驅劒瘞神仍王舟焚  
勢與徂康山魏廟在忠武激頑夫

哭徐博士二十韻

乾坤風色暮江漢哭斯人棘寺翻飛日文園久病身數  
奇官竟左材大命須貧放浪原違癖羈淹祗為親赤城  
終羽節壁水暫儒紳鵬鸚偏垂翮鯨鯢不縱鱗回殂豈  
道薄屈憤轉時屯藥石魂能返龍蛇識亦真楚狂嗟鳳  
鳥魯叟泣麒麟邂逅京華始風雲氣象新簞鵲陪玉筍  
倚馬接華裯宅燕南陽月花吟東郭春回頭成宿昔開  
眼漸風塵妻子今誰託文章後益振王喬跨鴈鵠傳說  
化星辰松柏丘墳崛灰沙劒鳥陳閭門寒擊甕吳水痛

沈珍宿草扁舟阻生芻絮酒伸碑非蔡邕愧誅宣仲宣  
倫獨把延陵劒吞聲淚滿巾

南浦驛見官押送來降韃靼詣桂林

款壘因王化投荒荷主恩官為供廩餼詔許挈兒孫瘴  
雨凋胡服蠻鄉引塞魂分明共日月耐可異乾坤慘澹  
顏容變軒昂故性存彎弓望五嶺似欲遂平吞

貢院雨夕東僉僚內江李君十四韻

鎖院春霖積分司湖水遙萋萋灑書閣藹藹度空寮葉

洗臨軒翠花含向客嬌扣簾時攬食翻卷夜焚膏竟誤  
朱衣點那防白鼠跳蛟龍雲雨會牝牡驥羣挑忽有同  
宗念爰申獨處謠涕流真慕賈兵論每凌晁意氣陳雷  
許時名李杜超暫違萌鄙吝相憶減丰標草徑青迷馬  
揚津綠漫橋樓臺迴暝色江海劇風潮恒切毛錐歎常  
懸寶劒招橫鱗詎池沼鵬鷄快雲霄

龍沙遇毛君武亭再餞

羈鴻常慕侶谷鳥友先求不盡龍宮興翻成虎帳遊夏

深濃岸柳雨減出蘆洲棹艤北沙穩山迎西戶幽江湖  
半落照風水獨離憂舊部羣公薦新符百粵州天浮洞  
庭濶海盡日南流白首今遙別金尊莫惓留

秋日訪王生山中因與攜酒躡嶠探蠻王洞觀  
古刻遂逾嶺造峴石而飲二十二韻

舊見今相聚新秋爾一過我尋龐氏鹿本美右軍鵝草  
木疎孤峴霜風落漢波紆徐習池轉巉峭寺林多道器  
沈冥蘊天倪吐吸和違羣甘衆吻守一賴神訶貧擬懸

鵜憲廉持訓虬軻甲縶巍世業章甫發賢科獻策菁偏  
斥逃名籍每醜巨魚行縱壑隻鳳且遊阿嬭嬭交簷柱  
菁菁被隰莪柴門伴老衲蕪逕謝鳴珂園賁幽人吉谿  
盤碩士邁卜隣王翰欲懷里仲宣頗去就堪余哂生涯  
奈路何昔人竟誰在吾道合狂歌逞醉探雲嶠逾巔憩  
石窩洞昏剥字蘚巖裊掛巾蘿一水寒明練千峯暮集  
螺笑疑搖地軸手可拂天河窈窕奔山鬼光華掩珮娥  
預防義馭速取辦魯陽戈

寄陸子深二十四韻

為復淹邦邑旋仍寄海城  
一看東泖月幾喚北江鶯  
地濕身曾健潮喧寐果驚  
鳥情終急哺驥子竟何成  
踽踽形將影滄滄弟憶兄  
累朝誰直筆四海獨蒼生  
前漢留班史雲間挺陸衡  
餐揮巨口鱸卧聽九臯鳴  
方朔元金馬長門足長卿  
文章會琬琰舉動必鏗鉤  
夜有青藜引晨趨華蓋行  
數甑楓禁切視草藥階清  
夙昔鄱陽使伊余擁幘征  
雲靈負嵎虎風湧駭波鯨  
黯黯川原血轟豕玉



石傾衣冠函竄突戟劒戛摩爭即幸緘書達猶慚虛左  
迎扶搖冀奮翼騷裊忽垂纓混沌玄黃戰陰沈日月精  
眉山亦按獄谷口合歸畊早見羞張執交纔似屈平竟  
陳徒憤鬱高義祇拘儻茫渤任公釣緱岑子晉笙吾衰  
尚餘此長嘯舞霓旌

送陳憲使淮上兵備

世徑轉蓬勤清秋袂一分攬綏霜日肅前路鼓笳聞誅  
殂元魚武出師非乏文渤光搖組練淮色變風雲陣偃

龍蛇互威行虎豹羣  
檄須陳記室客有孟參軍  
校獵歸常月投壺醉每曛  
椎牛將士飽賣劍婦男耘  
河伯黃樓壓芒碭赤氣殷  
徐人信慄悍楚壤鬱氤氲  
諸盜山東起長驅宇內焚  
斯邦實元元朝論日紛紛  
挽漕初疑阻提兵竟策勲  
瘡痍鑒不遠喉脇仗須君  
鷄擊豺狼伏春敷草木薰  
異時功業地壩海接江濱

寄贈余子

余子去吾久行藏今若何  
黃山住實近白髮爾應多  
身

以煙霞癖心通日月和龜蒙元倚釣康節竟成窩林壑  
潛虬日江湖放鷁過鄉人欽杖屨世路笑風波初度臨  
黃菊高筵敞薜蘿摘陳屈子頌鶴擬李生歌日落峰回  
色雲香客半酡壽杯思欲把惆悵隔三河

雨宴封丘別第

飛蓋凌晨集行宮映雨開天為歌鼓動霧拂舞筵迴賓  
客梁王盛山河故國哀長沙悲舊傳屠市隱真才憶昔  
兒童聚惟今老大催達人元曠逸萬物且形骸樂混寒

聲沸尊添暝色來斜風霑綺席疎點灑金杯雜逞龍仙  
互先爭虎豹摧轉眸升旭日覆手下秋雷尚有懽娛歟  
須防禮法猜門衢汨泥淖莫遣引燈回

黃君五十六歲始舉一子是年余亦有次郎黃  
冬官也厥父尚書余故得侈其家世

異骨成何晚真毛產固殊雲移丹穴種霧滃渥渥駟驀  
墮懷中月俄橫掌上珠試啼存大鑑摩頂協玄符彌月  
翻身健暮年認父呼聿曾提俎豆詎但識之無鄉里論

前輩尚書挺後模終於金石貫貽厥鬼神扶冠玉元諸  
子含香矧丈夫急流棄軒冕長嘯即江湖人每占瞿後  
天應福趙孤外家邠老裔晚景樂天雛瑞擬連胎蚌賢  
期返哺烏星辰追履上詩禮紹庭趨抱子誰非足憂時  
爾實迂向來顛種種今始覺于于失路均浮梗為隣獨  
守株弄璋亦偶爾獻璞欲何須漫俟兒童長虛愁日月  
驅龍緒吾暇較天地幾桑榆

秋日城東陂餞汪三

聚首仍何處分襟復此陂  
衣冠屯綠淑笳鼓截清猗  
自爾為三益伊余畏四知  
周交醇稷飲車坐衆賓  
嬉歎息今遲暮那堪古別離  
池臺杜甫徧舟楫謝安移棹撥天  
疑破窓旋岸欲隨涼風下  
菡萏人語避鳬鷺暫輟蕪葭  
唱真生霜露悲但看眼前事  
能負手中卮歎邑誰黃髮  
汪門汝白眉少遊梁孝苑  
老動季鷹思杳杳憐江海  
悠悠悵路岐餘霞散錦繡  
落日湧琉璃雲物秋元異  
懽娛夜更追寒蟾依斷梗  
微月隱疎籬逸氣衰猶壯  
睽心醉

不知淚深南浦草愁重北梅枝飲罷還持袂潮平是去  
時相尋有遙夢應繞碧湖湄

雪臺子家見杏花

九陌春風起居庭一見花偶來吾下馬先有客停車猶  
是輕寒日那禁爛漫霞覓詩巡獨樹汎酒摘高葩色故  
流衣袂香能染帽紗眼中俱是幻身外豈須嗟冷暖隨  
人事行藏付物華明朝約重賞莫遣落塵沙

贈王秋官二十四韻

紫氣開三極皇風穆四陲  
嶢嶢金虎地瀟灑白雲司東  
拔才賢入飛騰位望推呂  
條元慎罰虞典固先疑聿自  
刑書鑄相沿律令垂歷朝徒  
異議聖代實宏規域皞麟  
麟至囹圄空狴犴離羣居搜  
簡帙高揖講黃義眷此驂騑  
種曾於汗血知鯉庭真獨授  
鴈塔果爭馳爾在通家子  
余慚私淑師豪驚文考賦智  
讓孝娥碑道路分雙旆江湖  
把一麾閣清霜並肅車動雨  
偏隨禮樂徵王粲聲名采杜  
詩大龜終納錫威鳳合來儀  
振珮游香署戡冠侍



玉墀臯陶淑問日季路片言時汝遂青雲志吾寬白髮  
悲仕途迂謬逐丘壑太平宜但看陰陽轉寧論桑海移  
雪溪王子棹竹墅謝安碁顯晦誰能料流行每若斯寄  
言諸彥碩努力赴前期

贈復齋子二十韻

豈謂懸弧日今逢獻襪辰

丁亥十一月十九日冬至

梅樽初介壽葭

管暗浮春王國多賢者朝廷是聖人八荒元皞皞七世  
益振振北斗天元氣南陽帝近親方城鬱律律江漢白

紛紛憶昔生申甫崧高實降神一陽消長意七日往來  
因刻志耽經史忘形下縉紳座無絕纓客門有曳裾賓  
楚醴朝朝設梁園事事新心於業遂廣性以學而淳禮  
樂河間竝文章子建隣八公傳訣日三老述年晨瑞霧  
濛朱閣香塵擁畫輪庭開金玳瑁煙裊玉麒麟避地淹  
叢桂停雲詠大椿力耕知稼寶苦節愧儒珍欲振扶搖  
翮其如潦倒身呂嵇千里駕終擬託雷陳

陶行人宅贈

大道僧門對蕭然陶舍深未論五楊柳真懸一素琴坐  
向霜烟夕時聞鴻鴈音城笳流海思邊月起秋陰苦勸  
蒙騰醉應懷長別心但看得雲翼翼冥冥誰竟尋

漢上遇鍾參政

長安一為別十載但書傳我自河南至君來自沔川偶  
逢知萬事重會是何年館靜風依馬江鳴雨濯船情多  
看轉默酒後惜分眠明發孤帆疾愁經大別邊

登盤山頂顧望三湖

為訪三湖寺春山獨自來千盤不到頂萬壑劃爭迴石  
罅鳴雞犬林風過虎豺俯觀侯趙樹西望白雲臺峰日  
明寒雪谿泉激暗雷若非武陵口那得有桃開

空同集卷二十八

欽定四庫全書薈要卷一萬六千九百二十

集部

空同集卷二十九

明 李夢陽 撰

七言律一

赴郊觀宿

城邊水色淨春茅苑外鶯啼拂露梢  
萬戶煙花臨複道九天宮殿鎖南郊  
霓旌夜發清溪繞彩仗晨飛碧樹交  
身到鈞天渾不解坐聞仙樂下雲旂

曉詣西壇候駕

萬宇沉沉曉漏催  
九關魚鑰遲明開  
闐闐鼓角空中起  
片片鑪煙霧裏來  
氣結龍文隨御幄  
風傳虎旅發仙臺  
叨從百辟觀周典  
不向秋風數漢才

西壇候駕即事

太歲宮高接禁牆  
先農大纛兩相望  
陰陰背日朱旗閃  
黯黯參天翠柏長  
別殿鑪煙清幄次  
虛壇草色淨琴張  
祠官指點躬耕地  
田畯行瞻袞鉞光

扈從耕籍

天行近野團龍蓋萬姓環門識袞袍  
竟畝難寬卿相力藉耕無乃聖躬勞  
侵壇碧草茸茸起去殿紅雲冉冉高  
已忝賜筵思報述即陳潘賦愧詞曹

挂殿

挂殿芝房曙色通垂垂苑柳綠煙中  
桑乾斜映千門月碣石長吹萬里風  
已有金吾嚴御陌遙傳玉輅下齋宮  
侍臣鵲立松陰裏時倚紅雲望碧空

謁陵

本朝陵墓傍居庸間說先皇駐六龍一自玉輿回朔漠  
遂令金殿鎖秋峰明禋袞職雖多預備物祠官豈盡供  
報祀獨知今上切每於霜露見愁容

秋懷

龍池放舶他年事坐對南山憶往時紫閣峰如欺太白  
昆吾山自繞皇陂雙洲菡萏秋堪落亂水蘼葭晚更悲  
谷口子真今得否攀雲騎馬任吾之



其二

慶陽亦是先王地城對東山不啻墳白豹寨頭惟皎月  
野狐川北盡黃雲天清障塞收禾黍日落谿山散馬羣  
回首可憐鼙鼓急幾時重起郭將軍

其三

宣宗玉殿空山裏野寺霜黃鎖碧梧不見虎賁移大內  
尚聞龍舸戲西湖芙蓉斷絕秋江冷環珮淒涼夜月孤  
辛苦調羹三相國十年垂拱一愁無

其四

苑西遼后洗粧樓檻外芳湖靜不流  
亂世君臣那在眼  
異時松柏自深愁  
雕闌玉柱留天女  
錦石秋花隱御舟  
萬古中華還此地  
我皇親為掃神州

其五

胡奴本意慕華風  
將校和戎反劇戎  
遂使至尊臨便殿  
坐憂兵甲不還宮  
調和幸賴惟三老  
閱實今看有數公  
聞道健兒今戰死  
暮雲羌笛滿雲中

其六

曾為轉餉趨榆塞尚憶悲秋淚滿衣沙白凍霜月皎皎  
孤城哀笛鴈飛飛運籌前後無功伐推轂分明有是非  
西國壯丁輸輓盡近邊烟火至今稀

艮嶽篇

宋家行殿此山頭千載來人水一丘到眼黃蒿元玉砌  
傷心錦纜有漁舟金縉社稷和戎日花石君臣棄國秋  
漫倚南雲望南土古今龍戰是中州

感興

崑崙北極轉天河獨馬年時向北過  
渥洼西望迷龍種  
突厥南侵牧索駝黃花古驛風沙起  
白雪陰山金鼓多  
況是固原新戰鬪居人指點說干戈

雪後朝天宮

馬上城中見雪山白雲蒼霧滿燕關  
蓬萊咫尺無人到  
松柏黃昏有鶴還當日翠華游物外  
百年金殿鎖人間  
浮塵擾擾江湖遠悵望巖棲不可攀

新秋見月

憶在黃河草堂靜坐臨秋月孤娟娟水門蕭條向蘆葦  
石瀨逶迤回舸船頻干祿食去多阻遠望江湖情可憐  
傳語魚龍莫浪喜抱珠今夜且須眠

春晴憶湖上

湖上晴煙積雪春柳條湖水接芳新林鶯恰恰稀逢侶  
岸日暉暉低向人汀芷渚蘭暄自碧浴鳬飛鷺晚相親  
弄移白日思漁舸嘯倚青雲愧此身

晚晴郊望

早時鳴雨晚細微，忽有返照來荆扉。  
山禽水禽交止語，桃花梨花相逐飛。  
村村柳條弱欲斷，家家麥苗青不稀。  
睡起登樓時極目，出雲歸岫願何違。

郊行

二月梁園獨未歸，岸花汀柳各依依。  
且將弱縷牽行騎，莫厭繁香點客衣。  
蝶暖風暄從自得，鳥黃沙白為誰飛。  
平生漫有憐芳興，未老能令萬事稀。

河發登望

七月七日河水發康王城邊秋可憐買魚沽酒此村口  
打鼓鳴鑼何處船白晝蛟龍時一鬪中流日月晚雙懸  
紛紛估客休回首漁子清歌會渺然

時景

梁苑桃花寒復開塞門霜雪鴈飛迴天涯涕淚秋偏墮  
歲暮陰陽老更催無病過年遊五嶽不眠終夜望三台  
歸鴻漸木終非地濁浪滔天首重回

見雲雷垂垂不雨悵然有作

大梁城東雲出雷掣風拖雨故徘徊黃鸝坐樹深無語  
紫燕銜泥阻未迴即恐孝娥為旱塚不聞神女傍陽臺  
火雲西日垂垂暮屋隙愁看返照來

聞傍郡雷雨

尉氏陳留雷雨深大梁猶繫望霓心當堦螻蟻亦愁思  
對面斑鳩空好音河朔樓臺安避暑塞垣金鼓助沾襟  
江離憔悴黃塵滿寂寞魚龍何處吟



盜賊

敕書新調蜀襄兵漢北關南寇未輕密邇千斤竹查嶺  
不聞滿四石頭城秦州即易通王貢棧道終難拔漢旌  
安得較如曹相國務農休甲賀昇平

竹查山劉千斤叛地也滿四成化間

賊叛

喜雨命酌

毒熱兀兀滯梁城不眠聽雨到天明沙田易涸應全賴  
狼莠雖鋤却更生年稔不須防盜賊家貧魚得免經營

紛披檻竹迎余笑，遮莫尊醪起自傾。

晚晴步園

覽霽羣芳媚小園，步林斜日淨幽軒。  
歸雲過雨時間濕，並葉牽風對直翻。  
幸有桑麻供暮景，苦聞豺虎徧中原。  
天開霞石熒熒晚，瓦雀林鴉各自喧。

正德辛未四月十七日簡書始至於時久旱甘

澍隨獲漫爾寫興

苦蒸卓午汗交頤，昏暝雨飛如颺絲。  
舟楫自茲杳將去，

波濤滿意復何疑  
壘書況屬臨門日  
江漢須看放舸時  
肯信吾遊魚吏隱  
五峰彭蠡是襟期

旅泊雨夕聞鴈

季秋鄱岸陰陰雨  
殘葦折荷翻白濤  
此夜孤舟聞鴈語  
隔雲何處認風毛  
隨陽定慣湖波險  
避弋真驚塞角高  
南去北來同一旅  
世情人事莫蕭騷

日照

日照江烟翠欲重  
夢迴沙觀始鳴鐘  
浪於洪郡思洪子

豈合松門有赤松萬事寸心徒計較兩間衰鬢且從容  
靜來陡覺忘言好把酒看花意每濃

洪都以洪厓名松門山在新建縣

杪夏急雨江州

急雨吞江倒石根吐雲匡岳近城門驚雷不下雙蛟鬪  
孤電能開九疊昏白晝黃濤翻庾閣蒼崖翠木溜陶村  
乘時詫有扶搖力六月東南見化鯤

繁臺春集

小徑緣臺春自花重隄飛閣盡雲沙能將白髮隨流輩

奈有清壺遣歲華  
斷塔草垣增閨寂  
古城芳岸趣歌斜  
忽驚旅鴈思南北  
海色邊愁入暮笳

僦居避隘般移之日雨乎適至厥時久燥

土市子東曹門西衡門之下聊栖栖古堂踈豁還高榻  
故國行藏有杖藜已多佳樹琴書靜復值炎天雷雨低  
幡幡麥秀真堪喜阮籍窮途未足啼

出郊

簡懶經秋此出郊  
野煙霜日靜衡茅  
林桃葉盡青猶實

陂麥苗齊綠自苞隄曲獵狐穿雪窟塔巔彈鶴落風巢  
隨心樂事非難取舉眼平生覺易拋

探春

老去探春每怕遲酒朋棋伴日相追無心柳絮當人起  
有意桃花背馬隨臺榭草蒿離亂後往來絃管古今悲  
幽崖尚慮殘梅在玉笛丁寧莫放吹

野園

春來無雨風常顛野園諸花更可憐輕車快馬此何日

弄藥攀條看遠天，撲酒遊絲低細細。  
近人閒蝶過娟娟，真知白日繩堪繫。  
莫使孤城入暮煙。

冬歸繁臺別業漫興

莽壙孤城此卜居，宋臺梁苑獨行予。  
虛名馬愧千金後，白首螢憐萬卷餘。  
踏麥遽堪寒葉翠，看梅無那臘花舒。  
相逢莫漫嗔吾放，野醉郊吟盡可書。

雪日繁臺院閣酒集

臘朝廷向雪邊開，倚閣風從萬里迴。  
枯樹故當看處濕。

飛花偏墮掌中杯  
山河文物他年賦  
今古衣冠異地材  
舉目蕭蕭改天色  
玉梯扶醉更登臺

雪後上方寺集

雪罷園林出碧梧  
上方樓殿靜虛無  
日臨曠地冰先落  
雲破天塔自孤爛  
漫此堂人醉散一  
雙何處鶴來呼  
邀留更待松門月  
今夜同君坐玉壺

歲暮五首

萬木蕭蕭俱歲暮  
疎梅修竹可憐風  
三河晴雪飛鴻裏



四海孤城返照中  
白首園林惟閨寂  
紫塵車馬自開通  
誰堪物序驚前事  
況復馮高數廢宮

其二

臨除絃管益紛紛  
考鼓撞鐘處處聞  
蜀錦越羅連夜製  
綵蛾花勝逼年分  
流傳自是豪華地  
悵望能堪日暮雲  
澤草芊芊已新色  
鴈南猶起北風羣

其三

堂北融泥雲氣生  
堂南枯樹兩禽鳴  
冰霜眼過風須轉

歲月心懸老自驚  
辭臘酒憐比舍餽  
迎春花欲上階明  
壯圖回首今遲暮  
點檢塵埃笑拂纓

其四

歎往嗟來祇自癡  
未衰那即鬢如絲  
同朝鵷鷺雲霄隔  
故國松楸道路疑  
園草喚愁偏勃勃  
檻梅偷臘故垂垂  
端居寂寞無雙蒂  
強食栖遲有一枝

其五

歲當癸酉廬山曲  
冬盡扁舟記獨棲  
湖海合冰龍晝立

谿林壓雪虎時啼  
陰陽晴晦雙過鳥  
南北行藏一杖藜  
今日中原對河嶽  
暮雲回首楚江西

春暮

丁丑年作

歲歲花時出醉歸  
傷心今日復芳菲  
善開朱杏非雙蒂  
懶轉黃鸝只自飛  
海內詩朋官罷減  
城中酒伴病來稀  
庭枝爛漫催春暮  
日午風香獨倚扉

夜風堂前冬青架  
仆折其二榦  
曉雪驟至

冬青手植年真久  
冷日寒姿頗映堂  
追悔木闌晴未補

忍教風榦夜俱傷  
亂階朱實離離靜  
仆雪青條循循長  
翹首高雲憶松柏  
後凋溪壑轉蒼蒼

戊寅早春上方寺

地濶城空春自幽  
青松黑塔雲常浮  
入門鈴磬忽一發  
暇日臺池聊共遊  
連錢沓來誰氏騎  
白玉競浴何年鷗  
醉筆要知吾漫興  
明朝休用碧紗留

無題戲效李義山體

曾倚清酣奏綵毫  
象牀冰簟玉樓高  
徐娘老去風情在

班女愁來賦興豪  
秦柳日斜傷渭曲  
楚蘭春暮怨湘皋  
仙根寂寞崑崙遠  
浪說人間有碧桃

詩植甫畢風雪遽至漫爾有作

草樹新培置藥闌  
醉吟閒凭足心寬  
豈虞晨雪娟娟布  
無那春枝颭颭寒  
猶有一花當坐媚  
幸留雙柏與人看  
日晴紅綠應全勝  
為勸先生且放餐

為園

平生走馬呼鷹地  
白首為園學種瓜  
碧草故邀安石屐

青天常滿邵雍車圍闌換土心真苦繞菊依松徑不斜  
昨遇日晴閒自步別蹊桃李又風花

晚秋明遠樓宴集

斜日層城合暮煙新晴高閣敞秋筵衣冠四海追遊地  
霜露中原感慨年去鳥來鴻凭檻外飛雲落木把杯前  
回身忽在星辰上醉眼真疑到九天

新年作次喻監察韻

新年雨雪亦太恁十日中無一日晴豈應雷電除夜作

復爾天鼓東南鳴諸軍幸擣蓮池穴大將宜堅細柳營  
幾欲臨風撫長劒白頭還自笑書生

甲申元日試筆東友

人生五十驚衰醜五十從今又數三老慢更何防市虎  
少狂曾亦濫朝駟鸛鸞舊侶俱鳴珮鹿豕深山自結庵  
短髮不須憂重白吾居元傍百花潭

百一作菊

九日詣東莊遇水則舟之同黃李二生

出門萬木吟風葉挈友重陽上野舟數月雨陰今白日

一身天地此清秋  
逐時莊菊花初放  
應節村杯酒暫酬  
晚暮更催雙棹返  
汴州誰信有滄洲

正月大雨雪遣懷

梁園春初雲不開  
雪花壓城滾滾來  
似有驅龍朝玉闕  
豈無騎鶴下瑤臺  
光牽五嶽黃煙動  
勢擁三河白浪迴  
欲向瓊樓問寒暖  
袁安今已卧蒿萊

陶君誇其分司桃花獨樹余往觀之賦此

老懶今來特為花  
花奇親見主人誇  
入門風片時時墜



近酒春枝故故斜湖海一尊憐舊侶乾坤雙鬢愧年華  
明朝許赴柴門約共醉東園萬樹霞

和君席上海棠賞之二首

老興看花不厭頻折紅攀綠總怡神孤枝解動雙樽影  
數朶能回四座春誰遣物華成歲色自多人世有閒身  
年來斷酒因脾濕為爾還應暫入脣

其二

餅中海棠亦太劇細小翠擁臙脂深穠姿故薰欲醉眼

芳信暗傳嘗苦心偶逢一枝已自惜若臨全樹更須吟  
花時不道天無意一日常橫半日陰

莊上看花歸見庭中海棠落英與客同賦

三日野花風打稀朝遊酒伴暮醒歸臨門天桃不汝惜  
當院海棠胡自飛已憐錦繡半鋪地更訝芳香時點衣  
便應與君酌明月醉眼天地生光輝

春日過黃公新堂

黃家新堂逼春起紫燕尋巢時自來久陰煙雲眼底豁

乍晴河嶽窓中開物情野色且幽寂日光人意能徘徊  
持杯布席就芳草醉深同卧林邊苔

夏日

稍喜夏來天日晴遽看諸物盡生成  
累累杏實攢高蟻赤赤榴花坐小鶯  
晝夜寒暄猶混雜乾坤清濁固分明  
留賓酒茗吾能供春筍滿林今更生

陶公過曹濮分司見叢菊蔓草中移之自隨有  
詩傷之豈以為家物耶余覽而和之

野館寒芳抱自知  
好吟公子發秋悲  
春風世路元桃李  
霜露鄉關有鬢絲  
三嗅草萊行復立  
數株車馬載還隨  
東籬可謂君家物  
竹帛勲名晚節垂

正月四日赴黃子宴何儀賓助以美醪即席口

占

杜門常日追游少  
新歲初筵獨詣君  
幸有隣家能過酒  
況多賓客善論文  
樓臺霽日斜含雪  
竹樹和煙暮閣雲  
入夜不歸雙燭秉  
近尊猶喜落梅芬

陶王二君來賞牡丹

同城何苦不同歡，況復春風到牡丹。  
香滿正宜攜酒問，色深翻奈近燈看。  
綵雲黃霧晴長擁，澹月微霜夜故寒。  
任使羣芳妒傾國，古今須讓百花冠。

冬日學司偶見庭菊

凍雨晴霜爾自開，偶逢私恨過秋來。  
違時只為含中色，入藥終須顯上才。  
已許數花卷袖采，能分一本向籬栽。  
冬巡若憶重看約，莫使文韜觸雪迴。

晚秋東莊宴集

郊園秋晚只風林冠蓋羣遊是盍簪  
楓葉近尊朝映日菊叢淹坐暮橫陰  
煙霞故引旌旗色鳥雀應疑簫笛吟  
月底金鞍散歸馬野雲回首少微深

二月望留雲閣雨集

今年花朝花爛開春風細雨臨高臺  
繞闌紅濕舞英重隅窗黃閃流鶯迴  
連日霖霖地已足薄暮風雲天更來  
眼看萬物歛生色爾我胡惜黃金杯

海棠爛然要諸君子賞之分韻得壺字二首

繞樹巡簷興恨孤  
縹紅繁綠似渠無  
童知小徑晨先掃  
客有高軒夜特呼  
已拚落英欺舞袖  
更堪歌鳥勸提壺  
幸能老去花常健  
遮莫尊前醉共扶

其二


春深花樹爛模糊  
花下朋遊酒一壺  
帽側故拳輕朶插  
席安仍取積英鋪  
日烘擾擾蜂能趁  
煙動關關鳥更呼  
客散獨燒高燭照  
老來真自笑狂夫

雨中海棠

憐花常欲報花安  
醉眼冥冥雨自看  
朶朶胭脂深更濕  
杯杯竹葉滿須乾  
等閒細片休輕落  
率爾春風且恁寒  
朝為行雲暮仍雨  
凌波獨立汝應難

空同集卷二十九





總校官庶吉士臣侍朝

校對官編修臣閔惇大

膳錄監生臣吳錫綵

欽定四庫全書薈要

集部

空同集卷

三十二

詳校官候補通政司經歷臣郭祚熾



欽定四庫全書薈要卷一萬六千九百二十一

集部

空同集卷三十

明 李夢陽 撰

七言律二

郊齋逢人日有懷邊何二子

今日今年風日動苑邊新柳弱垂垂齋居寂寞難乘興  
獨立蒼茫有所思谷暖遷鶯翻太早雲長旅鴈故多遲  
鳳池仙客容臺彥兩處傷春爾為誰

夏日過序公

炎天樓殿蔭空扉，永晝雲林孤鳥飛。  
病起出門風色異，獨來清坐老僧依。  
撲簾花片疑紅雪，解帶藤蘿映紫衣。  
萬事回頭誰得問，但逢心賞莫教違。

過馬陟次毛庶子韻

冉冉輕雷止復行，鳳池清夏半陰晴。  
漸看西日籠花氣，誰放南風作雨聲。  
融入塹沙將拂燕，密侵宮柳益霑鶯。  
晚來一赴薇郎約，匹馬衝泥遠興生。

章氏芳園餞朱應登

細雨林塘花可憐  
況有美酒斗十千  
見日玄蟬元嘒嘒  
含風綠篠自娟娟  
朝廷豈料更新主  
塵世難逢感昔年  
縱倒芳尊不成醉  
別懷憂緒兩淒然

訪何職方孟春新居二首

去年間汝在郴州  
對酒時常使我憂  
無客解題鸚鵡賦  
同誰出入鳳凰樓  
蕭湘夢澤今虛遠  
易水燕山不斷遊  
舊雨休嗟車馬伴  
卜隣先近李膺舟

其二

街北小堂卜築深  
離離竹檻稱幽吟  
不爭鵝鴨嫌隣舍  
旋置琴尊見客心  
呼雨乳鳩仍暫止  
定巢新燕故相尋  
層軒更許消清暑  
露頂同依嘉樹林

送殷進士病免歸

魯川西流石齒齒  
川上茅堂千樹林  
春行不費風雲詠  
日暮聊為梁父吟  
南瞻岱嶽雲峰峻  
東訪滄溟煙霧深  
司馬豈緣封禪病  
任公終有羨鰲心

別徐子禎卿得江字

我愛南州徐孺子，明瑤美璧世無雙。  
新從北極看南極，便自吳江下楚江。  
日落鷓鴣啼廟口，水清斑竹映船窓。  
褊衡王粲俱黃土，千載何人復此邦。

追舊寄徐子

憶昔逢君雪滿途，遙憐為客向江湖。  
看碑定憶羊開府，作賦先投楚大夫。  
日黑魚龍逐夢澤，草青麋鹿上姑蘇。  
空揮玉軫思流水，不得驂騑見過都。

過李氏荷亭會何子

三伏尋花到習池  
幽懷真與故人期  
出波菡萏晴相並  
度檻流螢晚故遲  
他日宴游能此地  
向來開落果由誰  
亦知塵世難逢醉  
且把芳筒當酒卮

酬諸太僕見贈

抱病逢春無那春  
雪晴雲氣相鮮新  
經旬不出惱官長  
束帶何由朝大賓  
豈謂煙霄無勁翮  
欲從江海訪遺珍  
商歌日暮悲風起  
索處應慙扣角人



答太僕儲公見贈

淮海先生海鶴姿年來何事鬢成絲  
安危異日須公等  
文雅于今是我師縱有孫陽難遇馬  
誰言安石但能基  
桂枝偃蹇空山裏旅病逢春故國思

病間聞何舍人夢故山有感

我逢新歲兼新病君夢故園登故山  
木杪啼猿行問訊  
枕邊流水莫潺湲深春古廟同誰往  
絕壁孤雲只自攀  
悵恨無家傍林谷定應何處卜鄉關

雨中憶張大夫園亭

我愛張家好亭子滿園林竹夏淒淒  
露花細雨飄窓裏映日輕雷過檻西  
已拚習池多樂事況逢光祿有新題  
朝回會與金蘭約走馬攜壺到碧溪

解官親友攜酒來看

嚴城擊鼓天欲曙風起平林纖月長  
故人開尊且復飲客子狂歌殊未央  
卧病一春違報主啼鶯千里伴還鄉  
他時若訪漁樵地洛水秦山各淼茫

送王照磨省覲

浮沙晶晶楚王臺  
苦竹泠泠帝子哀  
臘月江南鶯語合  
早春湘北杏花開  
貪趨綵服聊輕舫  
苦憶金門罷舉杯  
入幕却超難許並  
題橋司馬直須迴

寄徐子

徐子南游涉洞庭  
楚江風浪眼冥冥  
竭來振玉朝天子  
忽漫傳書與客星  
訪戴難移剡溪棹  
問奇曾過子雲亭  
煙沙水國催春發  
楊柳愁邊却盡青

寄徐編修縉

題詩傳語玉堂賓想像鳴鞭散紫宸  
玩弄門前金騶褭宛如天上石麒麟  
徒誇中論流人世實有新詩泣鬼神  
密勿願先諧大軸漁樵久已屬閒身

九日寄何舍人景明

九日無朋花自開登樓獨酌當登臺  
孤城落木天邊下萬里浮雲江上來  
但遣清尊常不負從教白髮暗相催  
梁南楚北無消息塞鴈風高首重回

冬霽宴丘翁林亭

竹亭高宴雪霜殘  
柏塢移尊月色寬  
馴鶴自知迎客舞  
絕琴今擬向君彈  
醉來箕踞仍呼酒  
老去留賓不著冠  
解道冥鴻能萬里  
肯輸烏鵲一枝安

立春遇雪東孫君二首

乾坤莽莽俱為客  
世路悠悠各愴神  
海內弟兄稀見面  
天涯霜雪又逢春  
馴階鳥啄猶呼侶  
破浪龍吟不避人  
幾欲開尊向梅柳  
白眉青眼為誰顰

其二

留滯周南春復春  
路迷何處問三秦  
竟非吾土堪垂淚  
不為儒冠豈誤身  
偷臘檻梅暄媚眼  
弄寒山篠晚傷神  
虛傳夜雪能乘興  
不見山陰鼓柁人

送張訓導棄官為母

蜀道干戈暮角悲  
水行溪壑轉春姿  
辭劉徐庶心先苦  
迴馭王陽願不遲  
正月巴山猶碧樹  
孤舟峽口已黃鸝  
并吞割據千年事  
愁見岷峨有戰旗

早春酬內弟璣

騎馬衝泥到竹扉，孤城雪日弄暉暉。  
將飛鴻鴈春相聚，得食魚蝦暖自肥。  
賈誼上書翻遠謫，桓榮稽古已多違。  
亦知匡濟諸君事，勿羨東臯早拂衣。

早春郊園贈別

野陰蒼蒼春不分，春堂黯黯惜離羣。  
柳條欲折不應手，林花即開誰寄君。  
鴈飛帆檣畏觸雪，日蒸山澤恣成雲。  
杳然攜別東園晚，綺席玉杯相對醺。

生日答李漁秀才

臘前此日梅花劇醖送初筵竹葉新千里共為青眼客  
百年余是白頭人清霜麗藥情休妒醉舞狂歌意總真  
忽憶退朝傳粥食遲迴吟望一沾巾

過內弟宅感詠

天漢橋東水竹居明公卜築迴幽虛軍城日月梁園永  
戚里山河宋殿餘諸弟冬林供雪笋重聞日饌躍江魚  
冰清牢落千年事手澤空嗟萬卷書



積雨鄭左二子晚宴

秋深衆草皆垂實雨久高牆半濕痕  
百歲榮枯同逆旅  
二儀風霧自黃昏  
烏鴉樹滑時窺屋  
泥濘人稀早閉門  
便合披蓑邀鄭左  
任從燒燭倒清尊

送王生還里

華池避俗屯螢火  
往日談經近鹿場  
萬里漂零余作客  
諸生親炙爾升堂  
昨來見面生春色  
歲暮還家帶雪霜  
懷土力微難並進  
強吟臨路獨淒涼

逢泰公門徒因寄

垂翅去年辭帝都散花今日見門徒  
乘杯老去還能否  
擊鉢狂來未信無  
暫止乳鶯元逐燕  
得時橫隼莫驚鳥  
清沙密竹追隨地  
腸斷飛虹月色孤

寄華韶州

十年不寄一封書  
索處常思萬里餘  
謫官賈生元獨遠  
抗言劉向果誰如  
新符海外勞分虎  
舊德朝中想佩魚  
退食昔移青瑣步  
論文徧過省郎廬

贈鄭庚

文物江東數畝都里傳貞白似君無門前不種鉤衣草  
堂上常巢返哺鳥為客老年今道路告歸春日復江湖  
沙溪酒熟兒孫勸拄杖徐行步綠蒲

北行家兄與內弟玉實間行偵緩急即如雷霆  
之下魂魄並褫矧又如饑渴

吾兄淚眼若懸河內弟疋羸苦更多昏黑同行草莽裏  
明星獨傍邑城過荒山葛藟縈初蔓空屋荆花滿故柯

臨路斷腸俱哽咽望歸攜手向煙蘿

寄答內弟璣九日繁臺見憶

悵別登臺逢九日雲間水落望長安風急愁聞木葉下  
秋清淚滿菊花團臨危始識交親重處世空嗟行路難  
一勺塗鱗終放擲九天歸翼待扶搏

喬太卿宇宅夜別

竹梧池館夜偏寒促席行杯漏未闌燕地雪霜連海嶠  
漢家鐘鼓動長安吟猿見月移孤樹宿鴈驚人起別灘

二十逢君同躍馬十年回首笑彈冠

別都主事穆奔喪歸

瑤池不聽鳳皇簫銀漢愁看烏鵲橋  
海內君親情併苦天涯書劍路俱遙  
陰陰朔塞鳴秋葉滾滾寒江急暮朝  
君去會應朝北斗余歸終擬伴漁樵

夜別王檢討九思

露白秋城角夜哀朔雲邊月滿燕臺  
仙人閣在銀河上嬴女簫從碧落來  
江葉自隨山葉舞燭花偏傍菊花開

風塵荏苒年華異莫怪臨岐數酒杯

宿江氏

尋山累日山中宿玉港回鑣見爾家世遠樓臺喬木裏  
族繁門巷一溪斜深冬野竹猶風葉細雨簷梅已凍花  
惆悵哲人今異代玉峰回首碧參差

穀日酬鄭屠二省使攜酒見訪

殊方穀日軒齊過返照虛窓暖自通短鬢江湖今會少  
早春閭闔舊趨同越南閩北風煙際岸柳園梅霽雪中

時世艱難須共濟此生杯酒任西東

滕閣訪屠子感贈

章門屢出緣尋子滕閣留懽晚不回  
霜落磧洲江漸細日斜鄉國鴈還來  
紅巾未信干戈息白髮能禁日月催  
千古棟雲簾亦捲西山秋色為誰開

雨秋友人見過有贈

時芳已後重陽雨搖落深驚昨夜風  
鴉雀小亭雲竹靜蘼葭寒水瀨江東  
詩名海內逢高適人物吳中有阿蒙

數過淹留非縱酒異鄉搔首各飛蓬

較射畢青雲峰示諸生

射畢孤峰聊獨上繞峰冬樹發孤雲天開遠岫遲遲見  
木落寒江細細分禮樂衣冠先此地綱常簪組愧斯文  
亨衢接武尋常事孝子忠臣百世芬

發南浦贈人

大寒冰雨何紛紛曉行日臨江吐雲得風舸舸故相逐  
異港鳬鷗還自羣浦南蓼洲春欲動岸西雪山晴未分



與君接席向香藹吟坐傳杯侵暮曛

江上逢羅通政

秋乘綵鷁修春服曉解牙章拜五雲三十超遷門下省  
遲迴瞻戀聖明君烈風江上年垂暮把酒旗亭袂忍分  
畫錦故山家慶集堂開鶴髮野梅芬

清江彭君幽居

新霽隔城江色來僻居春暮徑花開當門銀杏有千歲  
穿葉黃鸝能百迴南徼雲沙曾杖鉞北山薇蕨且銜杯

波深五月鱖魚至獨釣行吟鷗不猜

題嚴編修東堂新成

城居市遠同村僻堂構春成屬燕忙  
星檻夜凭斜北斗日牕朝坐影扶桑  
問奇頗類揚雄宅醒酒真輕李相莊  
喜即繫舟臨秀浦恨猶櫓笏背鈴岡

泰和南行羅通政舟送

開船日午君俄至逆水閒尊得竝船  
貪數岸花杯不記已衝江雨纜猶牽  
雲山楚越相逢地劒珮京華始識年

感昔願仍還省閣顧今俱已靜風煙

寄孟洋謫桂林教授

長沙賈誼君仍遠南涉三湘復九疑  
虎豹深山聊澤霧蛟龍得雨固須時  
行藏學閣蒼梧夕鼓角夷城白髮悲  
悵望適荆心豈忝飄零極海翅非垂

南康至日送韓訓導赴湖州推官

黯黯寒冬湖水頭遷官別我向湖州  
吾道百年逢小至雪江千里屬安流  
飛騰刑獄官非忝簡拔朝廷意實優

見說東南力已竭哀矜此外爾何求

仰頭遇友夜泊感贈

舟夜雙燈倚碧灘江雲靄靄覆春湍中年獨覺滄洲穩  
直道誰非行路難坐裏旌旗環滙澤花時金鼓發長安  
時危故國思芳草懶慢先君得挂冠

龍沙餞胡子還城

春卿送弟返扁舟子孟還城設餞遊樹蔭金沙開錦席  
花吟楚鳥勸吟甌平風岸壓黿鼉窟倒日江明鸛雀樓

古木徐亭偏寂寞醉希凝望水東流

吳育字春卿胡健字子孟俱宋顯人

也

### 別太華君

自我徘徊襄漢間秋風倏忽吹襄山  
鵝鶻竟日亂洲渚鴻鴈孤鳴愁草菅  
秦路傷心紫芝折楚巖回首桂花斑  
層城月出歌鐘滿誰念揚雄獨閉關

### 贈何君遷太僕少卿

省客新乘卿士車尋盟特別水雲居  
還朝賈誼元前席

去國虞生合著書  
貪顧休輕冀  
野馬祖行親  
釣汴河魚  
虛疑厄閏春  
情晚驛路羣  
花宛宛舒  
是年遇閏何有官  
似黃楊厄閏年之

句

夏日赴監察許君之宴同張監察

霜府池亭夏亦寒  
捲簾河嶽火雲殘  
筵開冰動琅玕簟  
酒伴瓜行白玉盤  
驀石尋花時徑往  
躍魚投餌晚留懽  
孰教逃暑陪驄馬  
自分清朝老釣竿

東趙訓導二首

趙安邊營將家子讀易人也

安邊坐堡近沙場  
白日胡沙慘慘黃  
鼓弩汝兄增品秩  
操觚吾子獨文章  
雙龍一命新朝闕  
三鯁諸生已報堂  
授易未容輕管輅  
操著端合契羲皇

其二

田園共傍古蕭關  
舞鳳城臨斬斷山  
連茹實期王貢上  
轉蓬俄聚洛河間  
風塵落葉頻驚眼  
首宿深杯且破顏  
宋岳魏臺俱不沒  
及秋騎馬肯同攀

酬和許監察九日對菊之作

風簷落葉隨行步坐近寒花引濁醪  
久客重陽還細雨故山他日幾登高  
羈心汴館頻寒藥醉眼江門舊送濤  
願戢霜威長晚色賸抽英響續遺騷

酬和李子夏日遊天王寺見贈

玉皇諸閣鎖空寥夙昔攀緣客互招  
細細嵩雲通佛拱冥冥河氣度僧寮  
柏潭路古搖晴荔竹洞城陰掩熱椒  
聞爾昨遊吾自阻碧紗誰並照煙霄



喜鄭生至自京師傳崔陸徐何諸人消息

汝從京國傳消息屈指離吾幾換年當日應劉俱老健  
竭來燕趙自風煙陽回草木清霜後歲暮賓朋醉眼前  
別業舊臺攜手在野鴻沙鳥日翩翩

繁臺冬日喜鄭生歸集

予從汝去稀過此即使經過亦惘然乍聚酒杯須落日  
久晴臘月有和煙向陽小草纖纖出傍水浮雲宛宛連  
野立舉天昏色起好橫酣眼望三川

正月二日臺卿李公監察毛公袁公枉駕而顧  
毛歸有作輒次其韻二首

君子三陽元並進朝廷四海況為家冠彈貢氏非吾願  
星聚荀門敢自誇走洗玉盤深映竹驕嘶驄馬半銜花  
綠尊未倒歸須夜臺拍無言已宿鴉

其二

吾生五九笑吾涯短圃低牆即是家酒熟喜當賓客過  
詩成慙使世人誇日臨河岳雲俱色春入樓臺樹自花

轉盼不堪天地異得栖無小後啼鴉

和毛監察秋登明遠樓之作

院鎖簾垂白日幽為誰乘興獨登樓地平嵩嶽牕中出  
天倒黃河檻外流坐對鑪煙雲並起醉搖霜筆樹還秋  
可憐大厦須梁棟未展那知匠氏憂

雪後困酒和王左史

旭日上雪簷溜懸廣文先生猶醉眠牀頭綠尊已交卧  
解醒復倒囊中錢開門泥濘午活活有客騎馬來翩翩

強起梳頭煨芋栗暖杯寒光仍四筵

東邊子變前韻

繁丘草青春可憐欲往恰值春風顛應門童子不通客  
空同先生閒自眠柳長故媚金色縷梅落盡鋪白玉錢  
安得即遊共爾閣滿引香醪花簇筵

仲春繁臺飲餞醉歸口占呈陳邊二使君

晝日起風花欲開過鴻未盡巢燕來看山已嚴陽翟駕  
羣餞復聚梁王臺苦云離合每不易便醉顛倒何嫌猜

背閣碧樹故裊裊當筵哢鳥時徘徊不見當年艮岳盛  
今日纍纍青草堆

春日過遂平將軍第同李尹

十年不到將軍第一日重來令尹偕春色不改延客閣  
芳樹盡覆彈琴齋尋香檻蝶娟娟逐競暖池魚宛宛皆  
晚步鹿蔥驚欲放續遊無吝玉為牌

限韻贈黃子

禁垣春日紫煙重子昔為雲我作龍有酒每要東省月

退朝曾對掖門松十年放逐同梁苑中夜悲歌泣孝宗  
老體幸強黃犢健柳吟花醉莫辭從

贈王推官相國之子

青年籍甚王推府得郡吞江復據湖楚楚驛驢當道路  
英英秋月坐冰壺三槐舊業承非忝駟馬高門望與俱  
相國醴筵今更數在邦無憶鯉庭趨

高門隄陳氏別業夏集

門隄平野突崔嵬幔屋深林石磴迴盛世行藏吾學圃

異鄉天地此登臺  
馮軒五月涼風入  
移席孤城返照來  
急管暮催杯更進  
醉翁非為酒徘徊

空同集卷三十



欽定四庫全書薈要卷一萬六千九百二十二

集部

空同集卷三十一

明 李夢陽 撰

七言律三

夏日繁臺院閣贈孫兵部魚懷大復子

獨馬孤城送客迴，亂蟬高柳出街杯。  
晴天河嶽今開閣，戰地金元晚上臺。  
才自籌邊期獻納，義猶傾蓋愧徘徊。  
何休門客如君幾，北望天風萬里來。



送楊子還里

曾修書院時江側君去懷予試一遊當日水山應更好  
別來松桂幾經秋謝詩早向麻源覓顏帖時從廟碣收  
此外何求惟有醉背山合起望泉樓

送張工副

為官秦邸君西去因憶簡王相遇時池出異蓮要作賦  
館開脩竹坐傳卮龍旗寂寞還雲氣鶴馭飄翩祗夢思  
寄問白頭強相國醴筵吟筆似前隨

夏行人齋太皇太后哀詔過此以病淹于郊館  
僕為作詩

野館春雲劇暮陰病臣哀詔此經臨君親敢謂三江遠  
涕淚懸知萬國心風砌獨花堪憤悶雨簷雙燕足清吟  
遐陬每引前星望賴爾魚程布此音

城南新業期王子不至

新園本欲誇王史竟日城南期不來即使屋荒還五柳  
忍令春暮只孤臺對人芳藥翻翻出近日浮雲細細開

已囑甕頭封綠蟻明朝倘許盡餘杯

再期王左史不至

地散官拘此亦希草堂重約忍偏違元期芍藥枝枝賞  
忽復葵榴片片飛諸客酒停時望旆孤城日落尚留扉  
人生樂事真能幾野立蒼雲又白衣

繁臺次秦氏韻

一秋今到十賢堂萬事傷心歎渺茫草綠梁臺猶殿閣  
花殘宋苑只宮牆天南星宿元朝斗崖北靈芝本向陽

未老息棲終傍此，預愁人擬卧龍岡。

送田生省母兄如晉

匹馬遙衝落日微，萬山何處是庭闈。  
塗紆沁上花應發，春盡并門雪尚飛。  
臨柏乍開荆樹閣，傍萱重著老萊衣。  
馮高試望風雲氣，大駕新從此路歸。

寄題孫氏苔溪草堂，孫是時始有婚事。

苔溪之傍何者丘？幾時自卜林塘幽。  
已聞寬田足放鶴，曾否餘錢魚買舟。  
狎人鸕鶿元成偶，近檻芙蓉故並頭。

塵世要留風格在東南聊作醉鄉遊

送毛監察還朝是時皇帝狩于揚河

楚生臨水送將歸黎子當筵賦式微天下汝為真御史  
百年吾是舊漁磯沙寒白日蓬科轉風起黃河木葉稀  
此去有書應力上太平天子本垂衣

送李行人還朝

南使樓船漫北迴西巡車駕歛東來星辰再逐千官入  
閭闔重臨萬國開寒盡旌旗猶拂雪春新環珮且沾梅

虞絃定有薰風奏佇望陽和徧九陔

逢吉生汴上

汴上相逢俱白頭秦中却憶少時游  
煙花樓閣春風日錦繡山河百二州  
未論聽鶯穿細柳實因走馬出長楸  
金尊邂逅今宵月明發仍懸兩地愁

郊園夏集別李沔陽

東門慣種召平瓜彭澤新成處士家  
晨起忽嘶花外馬君來同泛柳邊艖  
向人菡萏元隨檻哺子鵲鵲各占沙

金 卷三十一  
明發路岐愁把袂秋風江漢有歸槎

李沔陽飲後田鄭二子復集於斯莊望見陂水

驟落衆頗訝之

五馬柴門夜已迴二豪尊酒且重開林乾鳥雀羣應喜  
水落鳬鷺半不來疎懶合收任氏釣嘯歌真慕阮公臺  
亦知河朔非凡輩逃暑無辭掌上杯

早春酬張客見贈

周王祈雪罷燈遊楚客思鄉迴獨愁不雨風雲常嫋嫋



入春江漢轉悠悠穠花錦石添雙鬢橫笛短簫悲綠舟  
岐路斷腸俱不減予今搔首為西州

田居嘲答李沔陽

郊園自枉君侯車日日觸熱尋吾廬柳長風多抵欲睡  
瓜成雨來仍用鋤遠田陰陰立黃鵠新波雙雙跳白魚  
即令石水泥五斗豈無五馬愁騎驢

別熊御史出塞

今夕何夕春風微把酒長歌春興違嬌鶯乳燕黯不語

嫩蘂柔條空自稀都門車騎明朝發關下行人三月歸  
北望胡沙青草盡初連山外斷鴻飛

春望東何舍人

城南春望春可憐小苑高樓生暖煙幾家芳草斷腸處  
無數落花吹笛邊川原萋萋入暮雨車馬駸駸少年  
欲向仙郎誇白雪陽春久已絕人傳

贈張含

孔門諸子接升堂杜甫交遊盡老蒼萬里南歸望秋月

一樽對別逢春陽生兒當如李亞子有父況作尚書郎  
肅肅雲鴻天路永樊籬斥鷃莫空翔

題環上人精舍

前月到寺萱草香今月到寺葡萄長潢潦盈盈旭日動  
樓閣灑灑高雲涼出門每恨市城隅浮世空嗟車馬忙  
圓月清秋期重訪即扳留卧贊公房

送膠州學職

廣文先生騎馬來膠東膠西花欲開鱸堂蕭蕭帶暮雨

芹池殷殷鳴春雷太山西望真堪仰洙泗東流竟不迴  
寥落廟宮多古樹屬君收取棟梁材

送人還洛

十月朝天春始迴洛邦真喜使君來抑條臨路若相待  
梅花滿堂渾欲開雪晴幾過回鑾浦日落時登承露臺  
九重他日求賢詔不道今無賈傅才

秋日飲王子之第

宮堯玉殿逐秋開迤邐金風觸酒迴賓客百年梁氏苑

河山雙鬢李仙杯，露凋梧葉浮龍井。  
月引簫聲出鳳臺，莫羨同舟流逆調。  
須知雅樂是真才。

見素林公以詠懷六章見寄，觸事叙歌，輒成篇什數，亦如之末首，專贈林公。

南伐經年駕北還，麗雲遲日藹燕關。  
花明合殿春開扇，柳引千官曉復班。  
新有越裳供雪雉，是年始貢者三國更聞飛

將奪天山務農銷甲從，今事飽飯行歌興不慳。

其二

香含雞舌曾為吏日侍龍顏朝退時春色故搖三殿柳  
曉風偏放萬年枝鏘鏘劍佩鵷行亂裊裊旌旗鳳輦移  
迂謬一麾今廿載半生心事白頭知

其三

青天萬仞削芙蓉憶踏匡廬第一峰哀壑暮雲埋虎豹  
大江春浪變魚龍天池玉筆親留碣石室山僧獨扣鐘  
搔首昔曾霄漢上舊題應被紫苔封

其四

投簪萬里旋舟日暫憩覃園傍峴西潭起漢娥留佩賦  
井傳王粲倚樓題林猿浦鴈心常往楚雨襄雲路不迷  
縮項一槎真欲釣幾時重訪鹿門棲

其五

買園近闢三三徑啓戶遙當六六峰敢向大河誇樂土  
且將名嶽寄行蹤風林躍馬狐狸走草澤回舟鴈鷺衝  
昨復潁陽開別業傍軒新徙具茨松

其六

西伐親將龍虎軍南歸甘即鷺鷥羣謝安實費登山屐  
司馬虛傳諭蜀文釣罷蘭溪宵上月吟成壺嶺晝生雲  
何時勉為蒼生起悵望東南五色氛

小至後寄甥曹嘉

隔縣經秋汝面難好音為郡舅心寬三河鴈起沙先暮  
四海陽回雪尚寒萊竹召棠他日事石渠金馬向來官  
公餘定有尋幽興莫惜新篇寄我看

河上茅齋成呈家兄



愚弟罷官兄獨喜卜築茅齋傍竹林開窓忽見萬里色  
背水常留十畝陰春來燕子休相賀日暮幽人且自吟  
庭下會栽棠棣樹牀頭新製有虞琴

留別李田二秀才

五年梁苑棲遲穩千里南州忽此行海內尚還憂盜賊  
老夫何用拜簪纓音書陸續憑誰寄醖酒留連見我情  
惆悵暮天雲不盡秋風相憶豫章城

贈鄭羽士

怪爾零丁老鍊師藏珍破屋鬢成絲坐看丹竈宵忘寢  
行折園葵午療飢久雨水滄松樹死塌牆人過廟門疑  
空傳薦福千金帖今世誰尋少保碑

送蘇文學往主三賢書院

邦侯敦禮聘才賢梁客乘秋詣汝川堂上久懸徐穉榻  
門前俄報孝廉船雲山紫邏霜應峻風穴青松晚更妍  
獨上高丘試回首紫陽白鹿自江煙

鄭生聞子種樹有成便冒雪攜酒來看鄭時有

江東之行

鄭蔡騎驢雪故來無功行樹及春栽沾濡立愛新松色  
冷凍回驚早杏開密片深當紅蕾集寒聲虛帶翠蕤迴  
思君蓑笠滄江上酒罷翻愁去舸催

王績字無功

送蔡子赴省

君從歷下游三輔暫就薇花避柏烏關內久懸馮異望  
河西早上伏羌圖茶官詭譎時侵馬餉吏奔趨日備胡  
生養願今開氣象山河百二本皇都

鐘樓重別熊子

野寺荒臺餞客游，江湖城郭暫消憂。  
危檐獨趁翩翩燕，細浦雙行宛宛鷗。  
人世舉杯俱勝跡，風林長夏有清秋。  
情來不用重翹首，西北浮雲是帝州。

閻曹二子發京姪，木與之同舟而下。  
有詩紀之，予亦和此篇。

共水同舟伴謫居，海天春色靜涵虛。  
蠻方故啓流官路，漢史終收痛哭書。  
蜀徼山高常戴雪，滇門池苦亦生魚。

上林花樹年年在，前席行看入禁廬。

甥嘉謫官過汴，僦舍而居。以時炎熱，

萬里嚴程，此一州問親娛舅，爾須留遣人賓客，休填戶  
僦屋炎蒸，幸有樓穿檻，筍高猶足采，戲池魚美更何求。  
館甥舊地花仍好，得暇頻來看海榴。

園莊餞蔡客還江東

來日麥苗歸麥黃，炎郊攜手暮蒼蒼。別筵車馬吾先醉，  
落日東南江自長。檣燕岼花休促棹，小堂新竹尚餘觴。

吳門汴市無千里應把并州作故鄉

寄贈司寇林公還山

徵書強逼上彤闈退食長吟望翠微  
漢室本緣三策重都門真見二疏歸  
朝廷司寇元持法天下蒼生遽拂衣  
趨陛履聲皇念切夢魂能復五雲飛

謝南陵折贈牡丹十頭咸樓子重辦

王花折送出朱門國色俄臨處士村  
堆積實增春照耀傳看直至日黃昏  
先掄上萼圍詩卷已拚清香費酒樽

見說陳思才八斗洛陽真譜許同論

儀賓柳子以合懽芍藥見贈予自不識此花而  
柳云種時數年惟今歲雙朶時柳病方愈

賓卿贈藥驚竒異共帶分葩號合懽入手自摩雙萼歎  
逢人恐當一花看並頭虛漫誇蓮蕊單瓣還應壓牡丹  
汝抱縣疴今幸愈和中天遣助平安

夏日上方寺追念舊遊寄平陽王守前御史

伏天樓閣同遊地尊酒松林憶並攜驄馬昨朝三極北

虎符俄剖萬山西人間散合留高跡壁上風雲護舊題  
出守次公元入相汾川應與潁川齊

黃霸字次公

答杭雙溪渡河見寄

藩公赴鎮東來日野老扶筇北上時貪墨似聞拋印綬  
壺漿真見迓旌旗豫州河嶽元中土漢法封疆是重司  
廿載別君今幸此柴門能倒故人卮

奉寄邃菴相公之作

徵書北闕朝朝下不見東山起謝安黃閣兩朝心自赤



蒼生四海淚曾乾  
雲霄桃李猶門徑  
歲月絲綸只釣竿  
舟楫願公長好在  
風江日夜有波瀾

東莊冬日別謝行人

冬圃朋游菊半蕪  
風林互飲葉全鋪  
往來物理須霜露  
離合人情豈路途  
乾綠冷紅難避眼  
剩香餘馥故侵壺  
相逢莫漫憐修竹  
要識乾坤有碧梧

雙溪方伯夏初見過就飲石几留詩次韻

孤城春氣轉溫風  
石几閒門夏樹中  
遇客便移杯酒玩

題詩今得故人同猶驚鳥動花紛落況值日斜樽不空  
晚暮蒼茫萬里色賴君長劒倚崆峒

三司諸公久有蓮池之約會雨阻不赴乃移兵  
司東園而飲為詩以贈

西城宿雨天虛阻東園微晴人竟遊地濶儘容雲氣入  
亭深能使樹香留尊前俊傑齊三府林下迂疎自一丘  
勲業太平公等在故將高榻動南州

東莊再贈杭子魚呈其兄澤西年友

冬郊日白無風沙羣飲送客遊琅琊到日定生韋澗草  
有時同醉歐亭花我今五十半潦倒君日高貴元才華  
過鄉為問澤西子老吟何處饒煙霞

乙酉除夕答鄭生兄弟見贈之作

除夕天涯見客心連枝游子各悲吟徒將鬢雪凝青鏡  
且把鄉梅託素琴海嶽催春潛弄色冰霜爭歲返成陰  
吾家甕綠浮浮嫩兄弟能來秉燭斟

東莊謝臬司諸公攜酒見過

白日餘紅亂撲衣郊亭無事坐花飛何緣五柳嘶驄馬  
忽有羣公到竹扉過眼物華春自暮賞心朋輩老應稀  
亦知不是談玄宅倘許頻來各醉歸

上方寺會監司諸公

梁園四月斗炎蒸衆飲松堂爽色凝天上樂聲僧梵接  
掌中杯影塔雲層高情不使忙官奪野興常於勝地增  
西海漸生歸路月上方無藉散花燈

東莊藩司諸公見過

少年湖海老中原萬里誰期共一尊邂逅路岐須盡醉  
向來離合敢重論桑麻事業陶公徑鳥雀人情翟氏門  
懶散廢書瓜可種夜來時雨足吾園

于公廟會王帥以其防秋北行

新晴借廟張金鼓舊約鋪筵集縉紳氣早冷隨雲雨入  
地幽人與竹松隣時來拜命防秋將老去狂歌避世身  
醉別贈君雙玉劒持將西北掃風塵

新秋宣威後堂會張鮑二帥晚過東園作

戟府臨秋氣自威林亭過雨日能輝但邀文士揮彤管  
不願將軍試鐵衣雲濕白花籬槿重風搖朱果石榴稀  
彎弓欲看雙禽墮海濶天晴鴈不飛

酬聶監察淮上見寄

落木秋城動客哀急風胡鴈帶沙迴夷門合是投簪地  
淮海須憑攬轡才勲業壯心頻覽鏡暮雲詩句幾登臺  
太微實與羣星異已有光芒接上台

九日南陵送橙菊

朱門美菊采先芳  
玉圃新橙摘早霜  
傳送滿盤真鬪色  
分看隨手各矜香  
深憐便合移樽酌  
暫貯應須得蠲嘗  
獨醉秋堂卧風物  
一年晴雨任重陽

亭上限韻作

片雲黑日熱轉添  
忽有飛雨來纖纖  
任情玉杯但一弄  
乘興彩毫時復拈  
角巾芒鞋客竟日  
燕舞花明風滿簾  
垂頭人吏困自睡  
此地元非禮法嚴

送程生魚寄姑蘇五嶽黃山人

壓枝梅杏纍纍碧照眼櫻桃的的紅  
舟楫大江無晝夜  
路岐初夏有西東  
淹留欲暮林間日  
行坐惟便竹下風  
秋水一帆湖海上  
為傳雙鯉到吳中

寄水南子

孤雲晝陰董盆寺迴風夕電南神岡  
林木颼颼起新色  
茅堂微微生嫩涼  
高人北窓枕書卧  
有酒誰與開尊嘗  
鬱蒸殘暑不須念  
雷雨時覩蒼龍翔

夏都給勘鄴潞之戰惠見憶之作寄答四首



廿年不入紫宸朝  
白髮猶能伴野樵  
敢向驂騑爭道路  
固知鵬鷃自雲霄  
狂歌見月時呼酒  
懶性臨風欲棄瓢  
寄語昔遊青瑣客  
嶺雲溪雪記同招

其二

焚草常懷杜拾遺  
從容退食梧垣遲  
人當名世汝其輩  
國有興今固時衰  
年丘園合潦倒大  
業竹帛能留垂  
迨迨故人寸心在  
日日苦吟雙鬢知

其三

侍臣斧鉞雲中下山寨冰霜戰後行  
穿腦乍攀黎賊路石門重覽鄂王營  
中興崖石元留頌成筭朝廷敢論兵  
試向絕巔看大海年來波為聖人平

其四

宮堯上黨接壺關杖鉞東行歷萬山  
巖凍雪埋擒虎窟壑腥雲斫斫龍灣  
嶰嶰路透漁樵入蒼蔚林清鳥雀還  
為問登高能賦者雪毫幾掃白雲閒

熊監察至自河西喜而有贈

當年五郡乘輅過此日千城攬轡游封事幾騰天北極  
籌邊真歷地西頭崑崙壯壓胡塵斷弱水清翻漢月流  
若使巡行皆汝輩遠夷那係廟堂憂

空同集卷三十一